



石門山

對龍潭交流道行往石門水庫方向，會先影著龍潭个街路、經過右手析桃園縣客家文化館。跔等大路續等行：一溜崎，左手崁下，遠遠一隻阿啾箭，尾拂拂仔企在禾頭田脣个檳榔樹尖，該係大漢溪脣个三坑仔，樸實个老街路一條、朗朗水聲个石門大圳一線，異多人去該位箭自行車，食煨湯糝、菜包。河壩對門係大家熟事个大溪，頭擺係臺灣最內地个河壩港，一陣嘍栗屎仔啾啾滾順路飛往該片山頂，佢兜係山頂泰雅族个神話鳥「希利克」，偲俚斯毋好撼射這兜靈巧个鳥仔。

行轉右手崁頂，頭前一大陣擺攤仔个人，石門山个山腳下就到了。盲蹶山，先看看啊大家賣麼个東西：食个、用个、搞个，割來賣个果子、番薯、土雞仔卵，自家種个筷菜、番瓜、冬瓜。哦，一大腳盆淨俐个蜆仔，異像係水庫个淨水養出來个。咦，該係麼个？呵，係當久無看著个藕筍！手指仔大，一截一截、粉滑粉滑、白淨爽口个藕筍，這下斯阿蠻仔罕得看著。萋萋个藕筍，焯焯啊，打淨食——老人家頭擺个回想，後生人銃新个憶想。

老人細子，起腳蹶山了！一路蹶往上，山路都異澄。兩片樹影蔭等，全全毋會晒著日頭，毋過專專愛蹶崎。腳門係毋罅健，蹶到半山、頓腳一下，看往左片析山壠：哇！一窟靚膩膩仔个大陂塘，𠂔當沿還有青山箍等？！哈哈，石門水庫乜笑問：「係麼人企在樹蔭下，頭望望仔偷看佢啊？」係蹶山个偲俚，在這位頓腳，欣賞佢个恬靜、學習佢个寬容，拂忒一身都市人个悶積啦！山園肚不時傳來呶呶、吉咯乖、吉咯乖个竹雞仔聲，提醒企在半爛燦个偲俚，「這下係愛煞命牯蹶往上？還係對這位來退走？」

趕日頭還盲轉夜，蹶分佢透！篤實行，莫分山壁跳上跌落、翹暢、嘴擘擘仔个山狗大笑偲俚腳步亂；靜心行，竹葉、枸薑來送涼，山蘭、草花來送香，還有香絲仔、油桐樹膠偲俚遮日抵雨。山頂會到了，行左片？蹶右片？自家選！罅力，箭上右片个細山排、跋上壁澄个「好漢坡」、蹶到山嶼頂个「三角點」，四圍群山、水庫壩頂、山壠水路、平洋街路，收入眼底。毋罅力，選左片平路，行加一細段仔山路，宮廟个休息站既經煮好齋麵等你了。

閒日，來去撈山仔寮，一身愁勞拂盡、一日恬靜舒心，享受！

作者：彭瑞珠

☆詞彙學習☆

【尾拂拂仔】mi' fin fin e'：尾翼甩啊甩的，【腳門】giog' mun'：腳力。

喻驕傲的樣子。

【𠂔當沿】din' dong' ien'：周圍。

【嘍栗屎仔】bid lid sii' e'：繡眼畫眉。

【悶積】ad' jid'：鬱積。

【割來賣】god' loi' mai：批發來賣。

【呶呶、吉咯乖】iu iu、gid' gog' guai'：雌雄竹雞的叫聲。

【藕筍】ngiau' sun'：地藕、澤蘭根。

【銃新】cung xin'：全新。

【翹暢】ngong tiong：空歡喜。

【專專】zon' zon'：專一。

【齋麵】zai' mien：素麵。